

**Uunga siunnersuut:**

**Aningaasarsianit akileraarutit pillugit Inatsisartut inatsisaata, akileraaruserinermik ingerlatsineq pillugu Inatsisartut inatsisaata aamma sulisoqarnermut akitsuut pillugu Inatsisartut inatsisaata allanngortinneqarnerat pillugu Inatsisartut inatsisaat**  
(Akileraarusiisarnermi iluarsaaqqinnerup piviusunngortinneqarnera il.il.)

**§ 1**

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, kingullermik Inatsisartut inatsisaanni nr. 72, 20. november 2023-meersumi allanngortinneqartumi, makkua allanngortinneqarput:

**1. § 5, imm. 4, imatut oqaasertalerneqarpoq:**

” *Imm. 4.* Angajoqqaat, ataatassap/anaanassap, angajoqqaarsiat, aatap aanalluunniit meeqqamut inuussutissaqartitsissutitut tamakkiisumik ilaannakortumilluunniit akilersuutigisimasaat, taakkua akilersuisup inuussutissarsiorluni sulliviutaani sulinermi akissarsiatut tunniunneqarsimangippata aammalu taassuma aningaasarsiaanit akileraaruteqaataasussanit ilanngaatigineqarsinnaasimangippata, meeqqap aningaasarsiaanut ilanngullugit naatsorsuunneqassanngillat.”

**2. § 25 imatut oqaasertalerneqarpoq:**

” **§ 25.** Aningaasarsiat akileraaruteqaataasussat naatsorsorneqarneranni § 24, imm. 1 apeqqutaatinnagu, nerisaqarnermut aningaasartuutaanerusut, aningaasarsiaqartup imaluunniit namminersorluni inuussutissarsiummik ingerlatsisup aalisariummi imaluunniit umiarsuarmi sulinini pissutigalugu aningaasartuutigisimasinnaasai, ilanngaatigineqartussaannngillat.”

**3. § 26 atorunnaarsinneqarpoq.**

**4. § 34-imi ilanngunneqarpoq:**

”23) Avinnermi, averusernermi imaluunniit inooqatigiikkunnaarnermi aapparisamut akilersuutit, aapparisamut akilersuutinit, katissimalluni aappariinnermut inatsisit malillugit akilersuutinik tigusaqartartoq aamma akilersuisoq najugaqatigiinngippata imaluunniit sumiiffimmi ataatsimoortumiinngippata, annerpaatut aalajangersarneqarsinnaasumit, annertunerunngitsut.

24) Ingerlatseqatigiiffinnut Namminersorlutik Oqartussanit pigineqartunut tapiissutit, ineqarnermut politikkikkut suliniutissat piviusunngortinnissaannut ilaatillugu Namminersorlutik Oqartussanit tunniunneqartartut.”

**5.** § 38 a, imm. 1, imatut oqaasertalerneqarpoq:

”Sulinermut ilanngaas qinnuteqaateqarnani inunnu imm. 2-mi pineqartunut akilerneqartarpoq. Sulinermut ilanngaas kapitalimi matumani aamma akileraaruserinermik ingerlatsineq pillugu Inatsisartut inatsisaanni kapitali 5 a-mi malittarisassat naapertorlugit naatsorsorneqartarpoq akilerneqarlunilu.”

**6.** § 38 a-p kingorna §§ 38 b-g aammalu qulequttat taakkununga atasut imatut oqaasertalerneqarput:

” **§ 38 b.** Sulinermut ilanngaasip tunniunneqartup nalinga, aningaasarsianut tunngaviusut, takuuk § 38 c, inummut ilanngaasip, takuuk § 67, aamma ilanngaasip aalajangersimasup, takuuk § 21, imm. 2, katinnerannit annertunerusup, 17,5 procentiattut annertussuseqarpoq.

*Imm. 2.* Taamaattoq sulinermut ilanngaasip tunniunneqartoq ukiumi isertitaqarfiusumi ataatsimi 15.750 koruuninit annertunerusinnaanngilaq. (2025-mi annertussusaa).

*Imm. 3.* Sulinermut ilanngaasip nalinga aningaasarsianut tunngaviusut, takuuk § 38 c, ukiumut 250.000 koruuninit annertunerusup 6,3 procentianik annikillisinneqassaaq. (2025-mi annertussusaa). Taamaattoq sulinermut ilanngaasip amigartooruteqarfiusinnaanngilaq.

*Imm. 4.* Imm. 2-3-mi aningaasartat aamma aningaasarsianut tunngaviusunut killiliussat ulloq 1. januar 2026 aallarnerfigalugu ilanngullugulu, ukiumut aningaasaliiffiusumut pineqartumut procenti aaqqiissutissaq atorlugu siullermeersumik ukiumut iluarsineqassapput, takuuk procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat.

**§ 38 c.** Sulinermut ilanngaasip aningaasarsianut tunngaviusut tassaapput aningaasarsiat A-t aamma B-t akileraaruteqaataasartut katillugit, aningaasat § 41, imm. 2, aamma § 47 b, imm. 6 malillugit aningaasarsiat akileraaruteqaataasussanut naatsorsuinermit ilanngunneqanngitsut, ilassutigalugit.

*Imm. 2.* Aningaasarsianut tunngaviusuni, aktianit iluanaarutit Kalaallit Nunaanni ingerlatseqatigiiffinit tiguneqartut, ilaapput. Iluanaarutit tiguneqartut, iluanaarutinit akileraaruteqannginnermit aningaasartaannut naatsorsorneqassapput.

*Imm. 3.* Aningaasarsianut tunngaviusuni tunniussinerit, soraarnerussutisiaqalernissamut aaqquissuussinermit peqataasussaataaneq pillugu Inatsisartut inatsisaanni § 2, imm. 2-mi aamma 3-mi taaneqartut, ilaatinneqassanngillat tunniussinerit aalajangersakkami imm. 2, nr. 1-4-mi taaneqartut tassani ilaanatik.

*Imm. 4.* Aningaasarsianut tunngaviusuni aammattaaq aningaasarsiat § 70, imm. 2-mi, aamma § 71, imm. 4-mi pineqartunut ilaasut, ilaatinneqassanngillat.

#### *Tunniussinerugallartut*

**§ 38 d.** Sulinermut ilanngaataagallartumik naatsorsuineq tunniussinerlu aningaasarsiat A-t, akileraaruseriffimmut aningaasarsiat A-t nalunaarutigineqartut, pineqartunut ilaatinneqartut, tunngavigalugit qaammatikkaartumik pissapput.

*Imm. 2.* Namminersorluni inuussutissarsiummik ingerlatsisut, imm. 1-imi ilaatinneqartunik isertitaqartannigitsut, sulinermit ilanngaataagallartumik akileraarutaagallartut B-t akiligassannigortut akilerneqartullu aallaavigalugit, qaammatikkaartumik naatsorsuunneqassapput tunniussivigineqassallutillu.

*Imm. 3.* Aningaasarsiat, aalisarnermit, piniarnermit savaateqarnermillu tunisassianik Kalaallit Nunaanni tunisassiorfinnut tunisinermit pissarsiarineqartut, aningaasarsiatut imm. 2-mi taaneqartutut, suliarineqassapput. Taamaattoq tunniussinermi tunitsivimmit akileraarutit A-t nalunaarutigineqartut aallaavigineqassapput.

**§ 38 e.** Ukiumut sulinermit ilanngaammik eqqortumik tunniussisoqarneranit tamanna malitseqassasoq naatsorsuutigineqarpat, sulinermit ilanngaataagallartuq § 38 d-mi taaneqartuq akileraaruseriffiup annikillisissinnaavaa, qaffassinnaavaa imaluunniit pinngitsoortissinnaallugu. Akileraaruseriffiup inuup ataatsimoortumik ukiumut aningaasarsiai ilisimappagit § 38 f malillugu pisuni sulinermit ilanngaammik piumasaqaatigineqartut tunniunneqarsinnaapput. Aammattaaq inuup ukiumut aningaasarsiai taamaakkaluartuq § 38 b, imm. 2-mi akigititanit appasinnerusussaasut naatsorsuutigineqarpat, akileraaruseriffiup qaammatikkaartumik tunniussisarnerit aallarteqqinniarlugit aalajangersinnaavaa.

#### *Sulinermit ilanngaatip naatsorsorneqartarnera tunniunneqartarneralu*

**§ 38 f.** Akileraaruseriffiup aningaasarsianut tunngaviusunut, ukiumi sulinermit ilanngaatip katillugu nalinganut aammalu sulinermit ilanngaataagallartumut qaammatikkaartumik tunniunneqartumut naatsorsukkat, kingusinnerpaamik ukiup isertitaqarfiusup kingorna ulloq 1. september nassiutissavai. Sulinermit ilanngaammi annikinaarlugit tunniussisimanermi, naatsorsukkat nassiuunneqareernerisa kingorna kingusinnerpaamik qaammatip ataatsip qaangiunnerani, taakkua tunniunneqassapput. Annertunaarlugit sunniussisimanermi § 38 g malillugu akiliisitsisoqassaaq.

*Imm. 2.* Aallartitseqqinnermi sulinermit ilanngaammut 2.000 koruuninik annertunerusumilluunniit tunniussisoqartussanngussappat, imm. 1 malillugu naatsorsuineq aallarteqqinneqarsinnaavoq.

#### *Utertillugit akiliisarneq*

**§ 38 g.** Sulinermit ilanngaammut annertunaarlugit tunniussisimanermi, annertunaarlugit tunniunneqarsimasut, inuup kingusinnerusukkat ukiup isertitaqarfiusup pineqartup ingerlanerani imaluunniit ukiumi isertitaqarfiusumi kingusinnerusumiittumi sulinermit ilanngaammik tunniussinissamik piumasaqaataani, ilanngaatigineqassapput.

*Imm. 2.* Sulinermit ilanngaammi annertunaarlugit tunniunneqarsimasut, imm. 1 malillugu akilersinneqarsinnaanngitsut, piumasaqaat katillugu 2.000 koruuninik annertuneruppat, peqqusissuteqarnermi utertillugit akilerneqassasut piumasarineqarsinnaavoq. Tamakkiisumik akileraartussaataajunnaarnermi, sulinermit ilanngaat annertunaarlugi tunniunneqarsimasuq oqaaseqatigiit siulliit malillugit akilersinneqassaaq. Utertillugit akiliinissamut piumasaqaatit

ulloq akiligassanngorfiat tassaavoq, peqqusissuteqarluni akileqqusinissamut aalajangiinerup qaammat kingorna qaammammi ulluinaq siulleq. Ulloq akiliiffissaq kingulleq tassaavoq qaammat akiliiffissami ulluinaq kingulleq. Ulloq piffissaq eqqorlugu akiliiffissaq kingulleq sapaataappat imaluunniit nalliuttuuppat imaluunniit arfininngorneruppat, killigititaq ulluinnarmut tullermut sivitsorneqassaaq.

*Imm. 3* Sulinermut ilanngaammut annertunaarlugit tunniussisimanermi akileqqusat akileraartarnermut akiliutissatut isigineqassapput, akileqqusallu Kalaallit Nunaanni eqqartuussisarnermik inatsimmi § 598, imm. 2, nr. 3 aamma Aningaasarsianit akileraarutit pillugit Inatsisartut inatsisaanni §§ 100 aamma 101 naapertorlugit pinngitsaaliilluni akileqquneqarsinnaapput.

*Imm. 4* Sulinermut ilanngaatiq annertunaarlugu tunniunneqarsimasup akilersinneqartarnera pillugu aammalu sulinermut ilanngaammi kingusinnerusukkut piunasaqaateqarnerup tamakkiisunngortinneqarnissaa pillugu maleruagassanik erseqqinnerusunik Naalakkersuisut aalajangersaasinnaapput.”

7. § 67, imm. 1-imi, ”48.000” allanngortinneqarpoq uunga: ”60.000”.

## § 2

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, takuuk Namminersorlutik Oqartussat inatsimmut nalunaarutaat nr. 11, 3. november 2021-meersoq, Inatsisartut inatsisaanni nr. 12, 1. december 2021-meersumi, Inatsisartut inatsisaanni nr. 20, 21. november 2022-meersumi, aamma Inatsisartut inatsisaanni nr. 65, 20. november 2023-meersumi allanngortinneqartumi, makkua allanngortinneqarput:

1. § 29-p kingorna qulequttatut nutaatut ilanngunneqarpoq:

### **”Kapitali 5 a** *Sulinermut ilanngaatiq*”

2. Qulequttap nutaap kingorna ilanngunneqarpoq:

” § 29 a. Sulinermut ilanngaatiq nalinga tiguisissap nemkontoanut tunniunneqassaaq. Aningaasat oqaaseqatigiit siulliit malillugit tunniunneqarsinnaanngitsut, § 46 a, imm. 5 malillugu suliarineqassapput.

*Imm. 2.* Pisortat sulinermut ilanngaammi tunniunneqartussani ilanngaatiginninnerat, tunniunneqartussat 1/3-anit annertunerussaannngilaq, taamaattoq takuuk aningaasarsianit akileraarutit pillugit Inatsisartut inatsisaanni § 38 g, imm. 1. Sulinermut ilanngaammik tunniussinermi akiliussigallartoqarsinnaanngilaq imaluunniit piunasaqaammi ilannguttoqarsinnaanani.

### *Naammagittaalliorneq*

**§ 29 b.** Inuit ukiup isertitaqarfiusup ingerlanerani sulinermit ilanngaatip tunniunneqarallartup annertussusaa pillugu Akileraarusiinermik Aalajangiisartunut naammagittaalliorsinnaanngillat.

*Imm. 2.* Sulinermit ilanngaat 2.000 korusuuninik annertunerusunilluunniit sulinermit ilanngaataagallartumi annikinaaraluni tunniussisoqarsimasoq ilimagineqartariaqarpat, akileraartussaataasup qinnuteqarnerani sulinermit ilanngaat, akileraaruseriffiup naliliinera malillugu annikinaarlugu tunniunneqarsimasoq, piaartumik tunniunneqassaaq. Naalakkersuisut qinnuteqarnerup ilusissaa imarisassaalu pillugit maleruagassanik aalajangersaasinnaapput, ilanngullugu qinnuteqarneq qarasaasiatigoortumik tunniunneqassasoq.

*Sulinermit ilanngaatip allaffissornikkut aqunneqarnera*

**§ 29 c.** Akileraaruseriffik sulinermit ilanngaatip naatsorsorneqarnissaanut tunniunneqarnissaanullu IT atorlugu periaasissamik pilersitsissaaq aammalu aalajangersakkanik, killissaliussanik aamma algoritmenik IT atorlugu periaatsimi naatsorsuinermit taakkuninngalu tunniussinermit ilaasussanik, aalajangersaassalluni. Paasissutissat aningaasarsianit akileraarutit pillugit Inatsisartut inatsisaanni §§ 38 c-mi aamma d-mi taaneqartut saniatigut, paasissutissat suut, ilanngullugit siusinnerusukkat ukiuni isertitarineqarsimasut pillugit paasissutissat, qaammatikkaartumik tunniussisarnerit annikillisinneqarnerannik malitseqarsinnaanersut imaluunniit tunniunneqanngissinnaanersut, akileraaruseriffiup aalajangersassavaa.

*Imm. 2.* Naalakkersuisut sulinermit ilanngaatip allaffissornikkut aqunneqarnera pillugu maleruagassanik erseqqinnerusunik aalajangersaasinnaapput.”

**§ 3**

Sulisoqarnermit akitsuut pillugu Inatsisartut inatsisaanni nr. 10, 2. novembari 2006-imeersumi, Inatsisartut inatsisaat nr. 5, 26. april 2007-imeersumi, Inatsisartut inatsisaanni nr. 11, 3. juni 2015-imeersumi aamma Inatsisartut inatsisaanni nr. 9, 19. november 2020-meersumi allanngortinneqartumi, makkua allanngortinneqarput:

**1.** § 2, imm. 1, imatut oqaasertalerneqarpoq:

”Sulisoqarnermit akitsuut akissarsiarititat katinnerisa 1,9 procentiattut annertussuseqarpoq.”

**§ 4**

*Atuutilerneranut ikaarsaariarnermullu aalajangersakkat*

Inatsisartut inatsisaat ulloq 1. januar 2025 atuutilerpoq.

*Imm. 2.* Inatsisartut inatsisaat ukioq isertitaqarfiusoq 2025 aallarnerfigalugu atuutilerpoq, taamaattoq imm. 3-5 takuuk.

*Imm. 3.* 2024-mi ukioq isertitaqarfiusoq pillugu sulinermut ilanngaammut tunngatillugu akileraaruseriffik ulloq 1. september 2025 tikitsinnagu aningaasarsianut tunngaviusunut naatsorsuissaaq aammalu sulinermut ilanngaat naatsorsussallugu. Aningaasarsianut tunngaviusut amigartooruteqarfiuppata, sulinermut ilanngaat 0 koruuniussaaq. Ukiumut isertitaqarfiusumut 2024-mut sulinermut ilanngaatip nalinga, akileraaruserinermik ingerlatsineq pillugu Inatsisartut inatsisaanni § 25 malillugu akiliutaavallaarsimasoq tunniunneqassaaq allatigullu suliarineqassalluni. Taamaattoq akileraaruserinermik ingerlatsineq pillugu Inatsisartut inatsisaanni § 25, imm. 2 malillugu ajunngitsorsiassaqartitsisoqassanngilaq. Akileraaruseriffiup ukiumi sulinermut ilanngaatip naatsorsorneqarnera nassiutissavaa.

*Imm. 4.* § 3 aningaasarsianut allanullu akissarsianut akitsuuserneqartussaataasunut, ulloq 1. januar 2025 kingusinnerusumiluunniit tunniunneqartunut, tunngatillugu atuutissaaq.

*Imm. 5.* § 1, nr. 4-mi, § 34, nr. 24 siunnersuutigineqartoq, ukiumut isertitaqarfiusumut 2024-mut kingornanullu atuutissaaq.

*Namminersorlutik Oqartussat, ulloq xx. xxx 2024*

Naalakkersuisut Siulittaasuat